

[www.allbdbooks.com](http://www.allbdbooks.com)

রবীন্দ্রনাথ ঠাকুরের কবিতা কালেকশন

[www.allbdbooks.com](http://www.allbdbooks.com)

s

[www.allbdbooks.com](http://www.allbdbooks.com)

➤ ছয়

অতিথিবৎসল,  
ডেকে নাও পথের পথিককে  
তোমার আপন ঘরে,  
দাও ওর ভয় ভাঙিয়ে।  
ও থাকে প্রদোষের বস্তিতে,  
নিজের কালো ছায়া ওর সঙ্গে চলে  
কখনো সমুখে কখনো পিছনে,  
তাকেই সত্য ভেবে ওর যত দুঃখ যত ভয়।  
দ্বারে দাঁড়িয়ে তোমার আলো তুলে ধরো,  
ছায়া যাক মিলিয়ে,  
থেমে যাক ওর বুকের কাঁপন।

বছরে বছরে ও গেছে চলে  
তোমার আঙিনার সামনে দিয়ে,  
সাহস পায় নি ভিতরে যেতে,  
ভয় হয়েছে পাছে ওর বাইরের ধন  
হারায় সেখানে।  
দেখিয়ে দাও ওর আপন বিশ্ব  
তোমার মন্দিরে,  
সেখানে মুছে গেছে কাছের পরিচয়ের কালিমা,  
ঘুচে গেছে নিত্যব্যবহারের জীর্ণতা,  
তার চিরলাবণ্য হয়েছে পরিস্ফুট।

পান্থশালায় ছিল ওর বাসা,  
বুকে আঁকড়ে ছিল তারই আসন, তারই শয্যা,  
পলে পলে যার ভাড়া জুগিয়ে দিন কাটালো  
কোন মুহূর্তে তাকে ছাড়বে ভয়ে  
আড়াল তুলেছে উপকরণের।

## ➤ ঝড়ের দিনে

আজি এই আকুল আশ্বিনে  
মেঘে-ঢাকা দূরন্ত দুর্দিনে  
হেমন্ত-ধানের থেতে বাতাস উঠেছে মেতে,  
কেমনে চলিবে পথ চিনে?  
আজি এই দূরন্ত দুর্দিনে!

দেখিছ না ওগো সাহসিকা,  
ঝিকিঝিকি বিদ্যুতের শিখা!  
মনে ভেবে দেখো তবে এ ঝড়ে কি বাঁধা রবে  
কবরীর শেফালিমালিকা।  
ভেবে দেখো ওগো সাহসিকা!

আজিকার এমন ঝঞ্ঝায়  
নূপুর বাঁধে কি কেহ পায়?  
যদি আজি বৃষ্টির জল ধুয়ে দেয় নীলাঞ্চল  
গ্রামপথে যাবে কি লঙ্কায়  
আজিকার এমন ঝঞ্ঝায়?

হে উতলা শোনো কথা শোনো,  
দুয়ার কি খোলা আছে কোনো?  
এ বাঁকা পথের শেষে মাঠ যেথা মেঘে মেশে  
বসে কেহ আছে কি এখনো?  
এ দুর্যোগে, শোনো ওগো শোনো!

আজ যদি দীপ জ্বালে দ্বারে  
নিবে কি যাবে না বারে বারে?  
আজ যদি বাজে বাঁশি গান কি যাবে না ভাসি  
আশ্বিনের অসীম আঁধারে  
ঝড়ের ঝাপটে বারে বারে?

## ➤ চড়িভাতি

ফল ধরেছে বটের ডালে ডালে ;  
অফুরন্ত আতিথেয় তার সকালে বৈকালে  
বনভোজনে পাখিরা সব আসছে ঝাঁকে ঝাঁক—  
মাঠের ধারে আমার ছিল চড়িভাতির ডাক ।  
যে যার আপন ভাঁড়ার থেকে যা পেল যেইখানে  
মালমসলা নানারকম জুটিয়ে সবাই আনে ।  
জাত-বেজাতের চালে ডালে মিশোল ক'রে শেষে  
ডুমুরগাছের তলাটাতে মিলল সবাই এসে ।  
বারে বারে ঘটি ভ'রে জল তুলে কেউ আনে ,  
কেউ চলেছে কাঠের খোঁজে আমবাগানের পানে ।  
হাঁসের ডিমের সন্ধানে কেউ গেল গাঁয়ের মাঝে ,  
তিন কন্যা লেগে গেল রান্নাকরার কাজে ।  
গাঁঠ-পাকানো শিকড়েতে মাথাটা তার খুয়ে  
কেউ পড়ে যায় গল্পের বই জামের তলায় শুয়ে ।

সকল-কর্ম-ভোলা

দিনটা যেন ছুটির নৌকা বাঁধন-রশি-খোলা  
চলে যাচ্ছে আপনি ভেসে সে কোন্ আঘাটায়  
যথেষ্ট ভাঁটায় ।

মানুষ যখন পাকা ক'রে প্রাচীর তোলে নাই  
মাঠে বনে শৈলগুহায় যখন তাহার ঠাঁই ,  
সেইদিনকার আল্লা-বিধির বাইরে-ঘোরা প্রাণ  
মাঝে মাঝে রক্তে আজও লাগায় মন্ত্রগান ।  
সেইদিনকার যথেষ্ট-রস আশ্বাদনের খোঁজে  
মিলেছিলেম অবেলাতে অনিয়মের ভোজে ।  
কারো কোনো স্বত্বদাবীর নেই যেখানে চিহ্ন ,  
যেখানে এই ধরাতলের সহজ দাক্ষিণ্য ,  
হালকা সাদা মেঘের নিচে পুরানো সেই ঘাসে ,  
একটা দিনের পরিচিত আমবাগানের পাশে ,  
মাঠের ধারে , অনভ্যাসের সেবার কাজে খেটে  
কেমন ক'রে কয়টা প্রহর কোথায় গেল কেটে ।

## ➤ সুপ্তোথিতা

ঘুমের দেশে ভাঙিল ঘুম, উঠিল কলস্বর ।  
গাছের সাথে জাগিল পাখি, কুসুমে মধুকর ।  
অশ্বশালে জাগিল ঘোড়া, হস্তীশালে হাতি ।  
মল্লশালে মল্ল জাগি ফুলায় পুন ছাতি ।  
জাগিল পথে প্রহরীদল, দুয়ারে জাগে দ্বারী,  
আকাশে চেয়ে নিরখে বেলা জাগিয়া নরনারী ।  
উঠিল জাগি রাজাধিরাজ, জাগিল রানীমাতা ।  
কচলি আঁখি কুমার-সাথে জাগিল রাজভ্রাতা ।  
নিভৃত ঘরে ধূপের বাস, রতন-দীপ জ্বালা,  
জাগিয়া উঠি শয্যাতে শুধালো রাজবালা ---  
'কে পরালে মালা !'

খসিয়া-পড়া আঁচলখানি বক্ষে তুলে নিল ।  
আপন-পানে নেহারি চেয়ে শরমে শিহরিল ।  
ত্রস্ত হয়ে চকিত চোখে চাহিল চারি দিকে---  
বিজন গৃহ, রতন-দীপ জ্বলিছে অনিমিত্তে ।  
গলার মালা খুলিয়া লয়ে ধরিয়া দুটি করে  
সোনার সূতে যতনে গাঁথা লিখনখানি পড়ে ।  
পড়িল নাম, পড়িল ধাম, পড়িল লিপি তার,  
কোলের 'পরে বিছায়ে দিয়ে পড়িল শতবার ।  
শয়নশেষে রহিল বসে, ভাবিল রাজবালা ---  
'আপন ঘরে ঘুমায়ে ছিনু নিতান্ত নিরালা,  
'কে পরালে মালা !'

নূতন-জাগা কুঞ্জবনে কুহরি উঠে পিক,  
বসন্তের চুম্বনেতে বিবশ দশ দিক ।  
বাতাস ঘরে প্রবেশ করে ব্যাকুল উচ্ছ্বাসে,  
নবীনফুলমঞ্জরীর গন্ধ লয়ে আসে ।  
জাগিয়া উঠে বৈতালিক গাহিছে জয়গান,  
প্রাসাদদ্বারে ললিত স্বরে বাঁশিতে উঠে তান ।  
শীতলছায়া নদীর পথে কলসে লয়ে বারি ---  
কাঁকন বাজে, নূপুর বাজে, চলিছে পুরনারী ।

কাননপথে মর্মরিয়া কাঁপিছে গাছপালা,  
আধেক মুদে নয়ন দুটি ভাবিছে রাজবালা ---  
'কে পরালে মালা !'

বারেক মালা গলায় পরে, বারেক লহে খুলি---  
দুইটি করে চাপিয়া ধরে বুকের কাছে তুলি ।  
শয়ন - 'পরে মেলায়ে দিয়ে তৃষিত চেয়ে রয়,  
এমনি করে পাইবে যেন অধিক পরিচয় ।  
জগতে আজ কত-না ধ্বনি উঠিছে কত ছলে ---  
একটি আছে গোপন কথা, সে কেহ নাহি বলে ।  
বাতাস শুধু কানের কাছে বহিয়া যায় হুহু,  
কোকিল শুধু অবিগ্রাম ডাকছে কুহু কুহু ।  
নিভৃত ঘরে পরান মন একান্ত উত্থালা,  
শয়নশেষে নীরবে বসে ভাবিছে রাজবালা---  
'কে পরালে মালা !'

কেমন বীর-মুরতি তার মাধুরী দিয়ে মিশা ----  
দীপ্তিভরা নয়ন-মাঝে তৃপ্তিহীন তৃষা ।  
স্বপ্নে তারে দেখেছে যেন এমনি মনে লয় ---  
ভুলিয়া গেছে রয়েছে শুধু অসীম বিস্ময় ।  
পার্শ্বে যেন বসিয়াছিল, ধরিয়াছিল কর,  
এখনো তার পরশে যেন সরস কলেবর ।  
চমকি মুখ দু হাতে ঢাকে, শরমে টুটে মন,  
লজ্জাহীন প্রদীপ কেন নিভে নি সেইক্ষণ !  
কন্ঠ হতে ফেলিল হার যেন বিজুলিঙ্ঘালা,  
শয়ন-'পরে লুটায় প'ড়ে ভাবিল রাজবালা ---  
'কে পরালে মালা !'

এমনি ধীরে একটি করে কাটিছে দিন রাত্রি ।  
বসন্ত সে বিদায় নিল লইয়া যুথীজাতি ।  
সঘন মেঘে বরষা আসে, বরষে ঝরঝর,  
কাননে ফুটে নবমালতী কদম্বকেশর ।  
স্বচ্ছহাসি শরৎ আসে পূর্ণিমামালিকা,  
সকল বন আকুল করে শুভ্র শেফালিকা ।  
আমিল শীত সঙ্গে লয়ে দীর্ঘ দুখনিশা,  
শিশির-ঝরা কুন্দফুলে হাসিয়া কাঁদে দিশা ।

[www.allbdbooks.com](http://www.allbdbooks.com)

ফাগুন-মাস আবার এল বহিয়া ফুলডালা,  
জানালা-পাশে একেলা বসে ভাবিছে রাজবালা ---  
'কে পরালে মালা !'

[www.allbdbooks.com](http://www.allbdbooks.com)

## ➤ বিসর্জন

দুইটি কোলের ছেলে গেছে পর পর  
বয়স না হতে হতে পুরা দু বছর।  
এবার ছেলেটি তার জন্মিল যখন  
স্বামীরেও হারালো মল্লিকা। বন্ধুজন  
বুঝাইল--- পূর্বজন্মে ছিল বহু পাপ,  
এ জনমে তাই হেন দারুণ সন্তাপ।  
শোকানলদগ্ধ নারী একান্ত বিনয়ে  
অপ্তাত জন্মের পাপ শিরে বহি লয়ে  
প্রায়শ্চিত্তে দিল মন। মন্দিরে মন্দিরে  
যেথা সেথা গ্রামে গ্রামে পূজা দিয়া ফিরে।  
ব্রতধ্যান-উপবাসে আফ্রিকে তর্পণে  
কাটে দিন ধূপে দীপে নৈবেদ্যে চন্দনে,  
পূজাগৃহে; কেশে বাঁধি রাখিল মাদুলি  
কুড়াইয়া শত ব্রাহ্মণের পদধূলি;  
শুনে রামায়ণকথা; সন্ন্যাসী-সাধুরে  
ঘরে আনি আশীর্বাদ করায় শিশুরে।  
বিশ্বমাঝে আপনারে রাখি সর্ব-নীচে  
সবার প্রসন্ন দৃষ্টি অভাগী মাগিছে  
আপন সন্তান-লাগি; সূর্য চন্দ্র হতে  
পশুপক্ষী পতঙ্গ অবধি--- কোনোমতে  
কেহ পাছে কোনো অপরাধ লয় মনে,  
পাছে কেহ করে ক্ষোভ, অজানা কারণে  
পাছে কারো লাগে ব্যথা, সকলের কাছে  
আকুল বেদনা-ভরে দীন হয়ে আছে।

যখন বছর-দেড় বয়স শিশুর---  
যকৃতের ঘটিল বিকার; জ্বরাতুর  
দেহখানি শীর্ণ হয়ে আসে। দেবালয়ে  
মানিল মানত মাতা, পদামৃত লয়ে  
করাইল পান, হরিসংকীর্তন-গানে  
কাঁপিল প্রাঙ্গণ। ব্যাধি শান্তি নাহি মানে।  
কাঁদিয়া শুধালো নারী, ``ব্রাহ্মণঠাকুর,



এত দুঃখে তবু পাপ নাহি হল দূর!  
দিনরাত্রি দেবতার মেনেছি দোহাই,  
দিয়েছি এত যে পূজা তবু রক্ষা নাই!  
তবু কি নেবেন তাঁরা আমার বাছারে!  
এত ক্ষুধা দেবতার! এত ভারে ভারে  
নৈবেদ্য দিলাম খেতে বেচিয়া গহনা,  
সর্বস্ব খাওয়ানু তবু ক্ষুধা মিটিল না!  
ব্রাহ্মণ কহিল, ``বাছা, এ যে ঘোর কলি।  
অনেক করেছ বটে তবু এও বলি---  
আজকাল তেমন কি ভক্তি আছে কারো?  
সত্যযুগে যা পারিত তা কি আজ পারো?  
দানবীর কর্ণ-কাছে ধর্ম যবে এসে  
পুত্রে চাহিল খেতে ব্রাহ্মণের বেশে,  
নিজ হস্তে সন্তানে কাটিল; তখন সে  
শিশুরে ফিরিয়া পেল চক্ষুর নিমেষে।  
শিবিরাজা শ্যেনরূপী ইন্দ্রের মুখেতে  
আপন বুকের মাংস কাটি দিল খেতে---  
পাইল অক্ষয় দেহ। নিষ্ঠা এরে বলে।  
তেমন কি এ কালেতে আছে ভূমণ্ডলে?  
মনে আছে ছেলেবেলা গল্প শুনিয়াছি  
মার কাছে--- তাঁদের গ্রামের কাছাকাছি  
ছিল এক বন্ধ্যা নারী, না পাইয়া পথ  
প্রথম গর্ভের ছেলে করিল মানত  
মা-গঙ্গার কাছে। শেষে পুত্রজন্ম-পরে,  
অভাগী বিধবা হল; গেল সে সাগরে,  
কহিল সে নিষ্ঠাভরে মা-গঙ্গারে ডেকে,  
`মা, তোমারি কোলে আমি দিলাম ছেলেকে---  
এ মোর প্রথম পুত্র, শেষ পুত্র এই,  
এ জন্মের তরে আর পুত্র-আশা নেই।'  
যেমন জলেতে ফেলা, মাতা ভাগীরথী  
মকরবাহিনী-রূপে হয়ে মূর্তিমতী  
শিশু লয়ে আপনার পদ্মকরতলে  
মার কোলে সমর্পিল।--- নিষ্ঠা এরে বলে।

মল্লিকা ফিরিয়া এল নতশির করে,  
আপনারে ধিক্কারিল--- ``এত দিন ধরে  
বৃথা ব্রত করিলাম, বৃথা দেবার্চনা---  
নিষ্ঠাহীনা পাপিষ্ঠারে ফল মিলিল না।

ঘরে ফিরে এসে দেখে শিশু অচেতন  
স্বরাবেশে; অঙ্গ যেন অগ্নির মতন।  
ঔষধ গিলাতে যায় যত বার বার  
পড়ে যায়--- কণ্ঠ দিয়া নামিল না আর।  
দন্তে দন্তে গেল আঁটি। বৈদ্য শির নাড়ি  
ধীরে ধীরে চলি গেল রোগীগৃহ ছাড়ি।  
সন্ধ্যার আঁধারে শূন্য বিধবার ঘরে  
একটি মলিন দীপ শয়নশিয়রে,  
একা শোকাতুরা নারী। শিশু একবার  
জ্যোতিহীন আঁখি মেলি যেন চারি ধার  
খুঁজিল কাহারে। নারী কাঁদিল কাতর---  
‘‘ও মানিক, ওরে সোনা, এই-যে মা তোর,  
এই-যে মায়ের কোল, ভয় কী রে বাপ।  
বক্ষে তরে চাপি ধরি তার স্বরতাপ  
চাহিল কাড়িয়া নিতে অঙ্গে আপনার  
প্রাণপণে। সহসা বাতাসে গৃহদ্বার  
খুলে গেল; ক্ষীণ দীপ নিবিল তখন;  
সহসা বাহির হতে কলকলধ্বনি  
পশিল গৃহের মাঝে। চমকিল নারী,  
দাঁড়ায়ে উঠিল বেগে শয়্যাতল ছাড়ি;  
কহিল, ‘‘মায়ের ডাক ঐ শোনা যায়---  
ও মোর দুখীর ধন, পেয়েছি উপায়---  
তোর মার কোল চেয়ে সুশীতল কোল  
আছে ওরে বাছা।

জাগিয়াছে কলরোল  
অদূরে জাহ্নবীজলে, এসেছে জোয়ার  
পূর্ণিমায়। শিশুর তাপিত দেহভার  
বক্ষে লয়ে মাতা, গেল শূন্য ঘাট-পানে।  
কহিল, ‘‘মা, মার ব্যথা যদি বাজে প্রাণে  
তবে এ শিশুর তাপ দে গো মা, জুড়ায়ে।  
একমাত্র ধন মোর দিনু তোর পায়ে  
একমনে। এত বলি সমর্পিল জলে  
অচেতন শিশুটিরে লয়ে করতলে  
চক্ষু মুদি। বহুক্ষণ আঁখি মেলিল না।  
ধ্যানে নিরখিল বসি, মকরবাহনা  
জ্যোতির্ময়ী মাতৃমূর্তি ক্ষুদ্র শিশুটিরে

কোলে করে এসেছেন, রাখি তার শিরে  
একটি পদ্মের দল। হাসিমুখে ছেলে  
অনিন্দিত কাল্টি ধরি দেবী-কোল ফেলে  
মার কোলে আসিবারে বাড়ায়েছে কর।  
কহে দেবী, ``রে দুঃখিনী, এই তুই ধর,  
তোর ধন তোরে দিনু। রোমাঞ্চিতকায়  
নয়ন মেলিয়া কহে, ``কই মা... কোথায়!...  
পরিপূর্ণ চন্দ্রালোকে বিহ্বলা রজনী;  
গঙ্গা বহি চলি যায় করি কলধ্বনি।  
চীৎকারি উঠিল নারী, ``দিবি নে ফিরায়ে!  
মর্মরিল বনভূমি দক্ষিণের বায়ে।

## ➤ নিদ্রিতা

একদা রাতে নবীন যৌবনে  
স্বপ্ন হতে উঠিনু চমকিয়া,  
বাহিরে এসে দাঁড়ানু একবার---  
ধরার পানে দেখিনু নিরখিয়া ।  
শীর্ণ হয়ে এসেছে শুকতারা,  
পূর্বতটে হতেছে নিশিভোর ।  
আকাশকোণে বিকাশে জাগরণ,  
ধরণীতলে ভাঙে নি ঘুমঘোর ।  
সমুখে পড়ে দীর্ঘ রাজপথ,  
দু ধারে তারি দাঁড়ায়ে তরুসার,  
নয়ন মেলি সুদূর-পানে চেয়ে  
আপন-মনে ভাবিনু একবার---  
অরুণ-রাঙা আজি এ নিশিশেষে  
ধরার মাঝে নূতন কোন্ দেশে  
দুঃখফেনশয়ন করি আলা  
স্বপ্ন দেখে ঘুমায়ে রাজবালা ॥

অশ্ব চড়ি তখনি বাহিরিনু,  
কত যে দেশ বিদেশ হনু পার !  
একদা এক ধূসরসন্ধ্যায়  
ঘুমের দেশে লভিনু পুরদ্বার ।  
সবাই সেথা অচল অচেতন,  
কোথাও জেগে নাইকো জনপ্রাণী,  
নদীর তীরে জলের কলতানে  
ঘুমায়ে আছে বিপুল পুরীখানি ।  
ফেলিতে পদ সাহস নাই মানি,  
নিমেষে পাছে সকল দেশ জাগে ।  
প্রাসাদ মাঝে পশিনু সাবধানে,  
শঙ্কা মোর চলিল আগে আগে ।  
ঘুমায় রাজা, ঘুমায় রানীমাতা,  
কুমার-সাথে ঘুমায় রাজভ্রাতা ।  
একটি ঘরে রত্নদীপ জ্বালা,

ঘুমায়ে সেথা রয়েছে রাজবালা ॥  
কমলফুল বিমল শেজখানি,  
নিলীন তাহে কোমল তনুলতা ।  
মুখের পানে চাহিনু অনিমেষে,  
বাজিল বুকে সুখের মত ব্যাথা ।  
মেঘের মত গুচ্ছ কেশরাশি  
শিখান ঢাকি পড়েছে ভারে ভারে ।  
একটি বাহু বক্ষ-পরে পড়ি,  
একটি বাহু লুটায় এক ধারে ।  
আঁচলখানি পড়েছে খসি পাশে,  
কাঁচলখানি পড়িবে বুঝি টুটি---  
পত্রপুটে রয়েছে যেন ঢাকা  
অনাঘাত পূজার ফুল দুটি ।  
দেখিনু তারে, উপমা নাহি জানি---  
ঘুমের দেশে স্বপন একখানি,  
পালঙ্কেতে মগন রাজবালা  
আপন ভরা লাবণ্যে নিরালা ॥

ব্যাকুল বুকে চাপিনু দুই বাহু,  
না মানে বাধা হৃদয়কম্পন ।  
ভূতলে বসি আনত করি শির  
মুদিত আঁখি করিনু চুস্বন ।  
পাতার ফাঁকে আঁখির তারা দুটি,  
তাহারি পানে চাহিনু একমনে---  
দ্বারের ফাঁকে দেখিতে চাহি যেন  
কী আছে কোথা নিভৃত নিকেতনে ।  
ভূর্জপাতে কাজলমসী দিয়ে  
লিখিয়া দিনু আপন নামধাম ।  
লিখিনু 'অয়ি নিদ্রানিমগনা,  
আমার প্রাণ তোমারে সঁপিলাম ।'  
যতন করে কনক-সূতে গাঁথি  
রতন-হারে বাঁধিয়া দিনু পাঁতি---  
ঘুমের দেশে ঘুমায়ে রাজবালা,  
তাহারি গলে পরায়ে দিনু মালা ॥

➤ মেঘের পরে মেঘ জমেছে

মেঘের পরে মেঘ জমেছে,  
আঁধার করে আসে-  
আমায় কেন বসিয়ে রাখ  
একা দ্বারের পাশে।  
কাজের দিনে নানা কাজে  
থাকি নানা লোকের মাঝে,  
আজ আমি যে বসে আছি  
তোমারই আশ্রাসে।  
আমায় কেন বসিয়ে রাখ  
একা দ্বারের পাশে।

তুমি যদি না দেখা দাও  
কর আমায় হেলা,  
কেমন করে কাটে আমার  
এমন বাদল-বেলা।  
দূরের পানে মেলে আঁখি  
কেবল আমি চেয়ে থাকি,  
পরাণ আমার কেঁদে বেড়ায়  
দূরন্ত বাতাসে।  
আমায় কেন বসিয়ে রাখ  
একা দ্বারের পাশে।

➤ আমি বহু বাসনায় প্রাণপণে চাই

আমি বহু বাসনায় প্রাণপণে চাই,  
বঞ্চিত করে বাঁচালে মোরে।  
এ কৃপা কঠোর সঞ্চিত মোর  
জীবন ভরে।

না চাহিতে মোরে যা করেছ দান  
আকাশ আলোক তনু মন প্রাণ,  
দিনে দিনে তুমি নিতেছ আমায়  
সে মহাদানেরই যোগ্য করে  
অতি-ইচ্ছার সংকট হতে  
বাঁচায়ে মোরে।

আমি কখনো বা ভুলি, কখনো বা চলি  
তোমার পথের লক্ষ্য ধরে-  
তুমি নির্ভুর সম্মুখ হতে  
যাও যে সরে।

এ যে তব দয়া জানি হয়,  
নিতে চাও বলে ফিরাও আমায়,  
পূর্ণ করিয়া লবে এ জীবন  
তব মিলনেরই যোগ্য করে  
আধা- ইচ্ছার সংকট হতে  
বাঁচায়ে মোরে।

➤ কত অজানারে জানাইলে তুমি

কত অজানারে জানাইলে তুমি,  
কত ঘরে দিলে ঠাই-  
দূরকে করিলে নিকট, বন্ধু,  
পরকে করিলে ভাই।  
পুরনো আবাস ছেড়ে যাই যবে  
মনে ভেবে মরি কী জানি কী হবে,  
নূতনের মাঝে তুমি পুরাতন  
সে কথা যে ভুলে যাই।  
দূরকে করিলে নিকট, বন্ধু,  
পরকে করিলে ভাই।

জীবনে মরণে নিখিল ভুবনে  
যখনি যেখানে লবে,  
চির জনমের পরিচিত ওহে,  
তুমিই চিনাবে সবে।  
তোমারে জানিলে নাহি কেহ পর,  
নাহি কোন মানা, নাহি কোন ডর,  
সবারে মিলায়ে তুমি জাগিতেছ-  
দেখা যেন সদা পাই।  
দূরকে করিলে নিকট, বন্ধু,  
পরকে করিলে ভাই।



## ➤ পুরাতন ভূত

ভূতের মতন চেহারা যেমন, নির্বোধ অতি ঘোর---  
যা-কিছু হারায়, গিল্লি বলেন, ``কেষ্টা বেটাই চোর।  
উঠিতে বসিতে করি বাপান্ত, শুনেও শোনে না কানে।  
যত পায় বেত না পায় বেতন, তবু না চেতন মানে।  
বড়ো প্রয়োজন, ডাকি প্রাণপণ চীৎকার করি ``কেষ্টা---  
যত করি তাড়া নাহি পাই সাড়া, খুঁজে ফিরি সারা দেশটা।  
তিনখানা দিলে একখানা রাখে, বাকি কোথা নাহি জানে;  
একখানা দিলে নিমেষ ফেলিতে তিনখানা করে আনে।  
যেখানে সেখানে দিবসে দুপুরে নিদ্রাটি আছে সাধা;  
মহাকলরবে গালি দেই যবে ``পাজি হতভাগা গাধা---  
দরজার পাশে দাঁড়িয়ে সে হাসে, দেখে স্বলে যায় পিত।  
তবু মায়া তার ত্যাগ করা ভার--- বড়ো পুরাতন ভূত।

ঘরের কর্ত্রী রক্ষমূর্তি বলে, ``আর পারি নাকো,  
রহিল তোমার এ ঘর-দুয়ার, কেষ্টারে লয়ে থাকো।  
না মানে শাসন বসন বাসন অশন আসন যত  
কোথায় কী গেল, শুধু টাকাগুলো যেতেছে জলের মতো।  
গেলে সে বাজার সারা দিনে আর দেখা পাওয়া তার ভার---  
করিলে চেষ্টা কেষ্টা ছাড়া কি ভূত মেল না আর!  
শুনে মহা রেগে ছুটে যাই বেগে, আনি তার টিকি ধরে;  
বলি তারে, ``পাজি, বেরো তুই আজই, দূর করে দিনু তোরে।  
ধীরে চলে যায়, ভাবি গেল দায়; পরদিনে উঠে দেখি,  
হঁকাটি বাড়ায়ে রয়েছে দাঁড়ায়ে বেটা বুদ্ধির টেকি---  
প্রসন্ন মুখ, নাহি কোনো দুখ, অতি অকাতর চিত্ত!  
ছাড়ালে না ছাড়ে, কী করিব তারে--- মোর পুরাতন ভূত!

সে বছরে ফাঁকা পেনু কিছু টাকা করিয়া দালালগিরি।  
করিলাম মন শ্রীবৃন্দাবন বারেক আসিব ফিরি।  
পরিবার তায় সাথে যেতে চায়, বুঝায়ে বলিনু তারে---  
পতির পুণ্য সতীর পুণ্য, নহিলে খরচ বাড়ে।  
লয়ে রশারশি করি কষাকষি পোটলাপুটলি বাঁধি  
বলয় বাজায়ে বাজ্ঞ সাজায়ে গৃহিণী কহিল কাঁদি,  
``পরদেশে গিয়ে কেষ্টারে নিয়ে কষ্ট অনেক পাবে।

আমি কহিলাম, ``আরে রাম রাম! নিবারণ সাথে যাবে।  
রেলগাড়ি ধায়; হেরিলাম হায় নামিয়া বর্ধমানে---  
কৃষ্ণকান্ত অতি প্রশান্ত, তামাক সাজিয়া আনে!  
স্পর্ধা তাহার হেনমতে আর কত বা সহিব নিত্য!  
যত তারে দুষি তবু হনু খুশি হেরি পুরাতন ভৃত্য!

নামিনু শ্রীধামে--- দক্ষিণে বামে পিছনে সমুখে যত  
লাগিল পাণ্ডা, নিমেষে প্রাণটা করিল কণ্ঠাগত।  
জন-ছয়-সাথে মিলি এক-সাথে পরমবন্ধুভাবে  
করিলাম বাসা; মনে হল আশা, আরামে দিবস যাবে।  
কোথা ব্রজবালা কোথা বনমালা, কোথা বনমালী হরি!  
কোথা হা হন্ত, চিরবসন্ত! আমি বসন্তে মরি।  
বন্ধু যে যত স্বপ্নের মতো বাসা ছেড়ে দিল ভঙ্গ;  
আমি একা ঘরে ব্যাধি-থরশরে ভরিল সকল অঙ্গ।  
ডাকি নিশিদিন সক্ররুণ ক্ষীণ, ``কেষ্ট আয় রে কাছে।  
এত দিনে শেষে আসিয়া বিদেশে প্রাণ বুঝি নাহি বাঁচে।  
হেরি তার মুখ ভরে ওঠে বুক, সে যেন পরম বিত্ত---  
নিশিদিন ধরে দাঁড়ায়ে শিয়রে মোর পুরাতন ভৃত্য।

মুখে দেয় জল, শুধায় কুশল, শিরে দেয় মোর হাত;  
দাঁড়ায়ে নিব্বুম, চোখে নাই ঘুম, মুখে নাই তার ভাত।  
বলে বার বার, ``কর্তা, তোমার কোনো ভয় নাই, শুন---  
যাবে দেশে ফিরে, মাঠাকুরানীরে দেখিতে পাইবে পুন।  
লভিয়া আরাম আমি উঠিলাম; তাহারে ধরিল স্বরে;  
নিল সে আমার কালব্যাধিভার আপনার দেহ-'পরে।  
হয়ে জ্ঞানহীন কাটিল দু দিন, বন্ধ হইল নাড়ী;  
এতবার তারে গেনু ছাড়াবারে, এতদিনে গেল ছাড়ি।  
বহুদিন পরে আপনার ঘরে ফিরিনু সারিয়া তীর্থ;  
আজ সাথে নেই চিরসাথি সেই মোর পুরাতন ভৃত্য।

## ➤ হিং টিং ছট্

স্বপ্ন দেখেছেন রাতে হবুচন্দ্র ভূপ —  
অর্থ তার ভাবি ভাবি গবুচন্দ্র চুপ।  
শিয়রে বসিয়ে যেন তিনটে বাদরে  
উকুন বাচ্ছিতেছিল পরম আদরে —  
একটু নড়িতে গেলে গালে মারে চড় ,  
চোখে মুখে লাগে তার নথের আঁচড় ।  
সহসা মিলালো তারা , এল এক বেদে,  
‘পাখি উড়ে গেছে ‘ ব’লে মরে কেঁদে কেঁদে।  
সম্মুখে রাজারে দেখি তুলি নিল ঘাড়ে ,  
ঝুলায়ে বসায়ে দিল উচু এক দাঁড়ে।  
নীচেতে দাঁড়ায়ে এক বুড়ি খুড়খুড়ি  
হাসিয়া পায়ের তলে দেয় সুড়সুড়ি।  
রাজা বলে ‘কী আপদ ‘ কেহ নাহি ছাড়ে—  
পা দুটা তুলিতে চাহে , তুলিতে না পারে ।  
পাখির মত রাজা করে ঝটপট  
বেদে কানে কানে বলে — হিং টিং ছট্।  
স্বপ্ন মঙ্গলের কথা অমৃতসমান,  
গৌড়ানন্দ কবি ভনে , শুনে পুণ্যবান। ।

হবুপুর রাজ্যে আজ দিন ছয় —সাত  
চোখে কারো নিদ্রা নাই, পেটে নাই ভাত।  
শীর্ণ গালে হাত দিয়ে নত করি শির  
রাজ্যসুদ্ধ বালকবৃদ্ধ ভেবেই অস্থির ।  
ছেলেরা ভুলেছে খেলা, পন্ডিতেরা পাঠ,  
মেয়েরা করেছে চুপ এতই বিব্রাট।  
সারি সারি বসে গেছে, কথা নাহি মুখে,  
চিন্তা যত ভারী হয় মাথা পড়ে ঝুঁকে ।  
ভুঁইফোঁড় তব্ব যেন ভূমিতলে খোঁজে,  
সবে যেন বসে গেছে নিরাকার ভোজে।  
মারো মরো দীর্ঘশ্বাস ছাড়িয়া উৎকট  
হঠাৎ ফুকারি উঠে-হিং টিং ছট্।  
স্বপ্নমঙ্গলের কথা অমৃতসমান,  
গৌড়ানন্দ কবি ভনে , শুনে পুণ্যবান। ।

চারি দিক হতে এল পন্ডিতির দল—  
অযোধ্যা কনোজ কাঞ্চী মগধ কোশল।  
উজ্জয়িনী হতে এল বুদ্ধ-অবতংস  
কালিদাস কবীন্দ্রের ভাগিনেয় বংশ।  
মোটা মোটা পুঁথি লয়ে উলটায় পাতা,  
ঘন ঘন নাড়ে বসি টিকিসুদ্ধ মাথা।  
বড়ো বড়ো মস্তকের পাকা শস্যখেত  
বাতাসে দুলিছে যেন শীর্ষ- সমেত।  
কেহ শ্রুতি, কেহ স্মৃতি, কেহ-বা পুরাণ,  
কেহ ব্যাকারণ দেখে, কেহ অভিধান।  
কোনোখানে নাহি পায় অর্থ কোনোরূপ,  
বেড়ে ওঠে অনুস্বর-বিসর্গের স্তূপ।  
চুপ করে বসে থাকে, বিষম সংকট,  
থেকে থেকে হেঁকে ওঠে -হিং টিং ছট।  
স্বপ্ন মঙ্গলের কথা অমৃতসমান,  
গৌড়ানন্দ কবি ভনে, শুনে পুণ্যবান।।

কহিলেন হতাস্রাস হবুচন্দ্ররাজ,  
শ্লেচ্ছদেশে আছে নাকি পন্ডিত সমাজ—  
তাহাদের ডেকে আন যে যেখানে আছে,  
অর্থ যদি ধরা পড়ে তাহাদের কাছে। ‘  
কটা-চুল নীলচক্ষু কপিশকপোল  
যবন পন্ডিত আসে, বাজে ঢাক ঢোল ॥  
গায়ে কলো মোটা মোটা ছাঁটাছোঁটা কুর্তি-  
গ্রীষ্ম তাপে উল্লা বাড়ে, ভারি উগ্রমূর্তি।  
ভূমিকা না করি কিছু ঘড়ি খুলি কয়,  
‘সতেরো মিনিট মাত্র রয়েছে সময়—  
কথা যদি থাকে কিছু বলো চটপট। ‘  
সভাসুদ্ধ বলি উঠে - হিং টিং ছট।  
স্বপ্ন মঙ্গলের কথা অমৃতসমান ॥  
গৌড়ানন্দ কবি ভনে, শুনে পুণ্যবান।।

স্বপ্ন শুনি শ্লেচ্ছমুখ রাঙা টকটকে,  
আগুন ছুটিতে চায় মুখে আর চোখে।  
কিন্তু তবু স্বপ্ন ওটা করি অনুমান,

যদিও রাজার শিরে পেয়েছিল স্থান ।  
অর্থ চাই? রাজ কোষে আছে ভূরি ভূরি –  
রাজ স্বপ্নে অর্থ নাই যত মাথা খুড়ি ।  
নাই অর্থ, কিন্তু তবু কহি অকপট  
শুনিতে কী মিষ্ট আহা –হিং টিং ছট।’  
স্বপ্ন মঙ্গলের কথা অমৃতসমান,  
গৌড়ানন্দ কবি ভনে, শুনে পুণ্যবান।।

শুনিয়া সভাস্থ সবে করে ধিক্-ধিক্ ,  
কোথাকার গন্ডমূর্খ পামল নাস্তিক!  
স্বপ্ন শুধু স্বপ্ন মাত্র মস্তিষ্ক বিকার  
এ কথা কেমন করে করিব স্বীকার !  
জগৎ বিখ্যাত মোরা ‘ধর্মপ্রাণ’ জাতি—  
স্বপ্ন উড়াইয়ে দিবে! দুপুরে ডাকাতি!  
হবুচন্দ্র রাজা কহে পাকালিয়া চোখে,  
‘গবুচন্দ্র, এদের উচিত শিক্ষা হোক ।  
হেঁটোয় কন্টক দাও , উপরে কন্টক,  
ডালকুতাদের মাঝে করহ বন্টক’ ।  
সতেরো মিনিট—কাল না হইতে শেষ  
পল্লি পন্ডিতের আর না মিলে উদ্দেশ।  
সভাস্থ সবাই ভাসে আনন্দাশ্রুণীরে,  
ধর্মরাজ্যে পুনর্বীর শান্তি এল ফিরে।  
পন্ডিতেরা মুখচক্ষু করিয়া বিকট  
পুনর্বীর উচ্চারিল — হিং টিং ছট  
স্বপ্ন মঙ্গলের কথা অমৃতসমান,  
গৌড়ানন্দ কবি ভনে, শুনে পুণ্যবান।।

অতঃপর গৌড় হতে এল হেন বেলা  
যবন পন্ডিতদের গুরু মারা চেলা।  
নগ্নশির, সজ্জা নাই, লজ্জা নাই ধড়ে—  
কাছা কোঁচা শতবার থ’সে থ’সে পড়ে।  
অস্তিত্ব আছে না আছে , ক্ষীণথর্ব দেহ,  
বাক্য যবে বহিরায় না থাকে সন্দেহ।  
এতটুকু যন্ত্র হতে এত শব্দ হয়  
দেখিয়া বিশ্বের লাগে বিষম বিস্ময়।

না জানে অভিবাদন, না পুছে কুশল ,  
পিতৃনাম শুধাইলে উদ্যতমুখল।  
সগর্বে জিজ্ঞাসা করে, কী লয়ে বিচার!  
শুনিলে বলিতে পারি কথা দুই- চার,  
ব্যাখ্যায় করিতে পারি উলটপালট। ‘  
সমস্বরে কহে সবে –হিং টিং ছট  
স্বপ্ন মঙ্গলের কথা অমৃতসমান ,  
গৌড়ানন্দ কবি ভনে, শুনে পুণ্যবান।।

স্বপ্ন কথা শুনি মুখ গম্ভীর করিয়া  
কহিল গৌড়ীয় সাধু প্রহর ধরিয়া ,  
‘নিতান্ত❖ সরল অর্থ, অতি পরিস্কার—  
বহু পুরাতন ভাব, নব আবিষ্কার।  
ত্র্যম্বকের ত্রিযন ত্রিকাল ত্রিগুণ  
শক্তিভেদে ব্যক্তিভেদে দ্বিগুণ বিগুণ।  
বিবর্তন আবর্তন সম্বর্তন আদি  
জীবশক্তি শিবশক্তি করে বিসম্বাদী।  
আকর্ষণ বিকর্ষণ পুরুষ প্রকৃতি।  
আগব চৌম্বক বলে আকৃতি বিকৃতি।  
কুশাগ্রে প্রবহমান জীবাত্মবিদ্যুৎ  
ধারণা পরমা শক্তি সেথায় উদ্ভূত।  
ত্রয়ী শক্তি ত্রিস্বরূপে প্রপঞ্চে প্রকট,  
সংক্ষেপে বলিতে গেলে—হিং টিং ছট  
স্বপ্নমঙ্গলের কথা অমৃতসমান,  
গৌড়ানন্দ কবি ভনে, শুনে পুণ্যবান।।

‘ সাধু সাধু সাধু ‘ রবে কাঁপে চারি ধার—  
সবে বলে , ‘পরিস্কার, অতি পরিস্কার!’  
দুর্বোধ যা-কিছু ছিল হয়ে গেল জল,  
শ❖ন্য আকাশের মতো অত্যন্ত❖ নির্মল।  
হাঁপ ছাড়ি উঠিলেন হবুচন্দ্ররাজ,  
আপনার মাথা হতে খুলি লয়ে তাজ  
পরাইয়া দিল ক্ষীণ বাঙালির শিরে—  
ভারে তার মাথা টুক পড়ে বুম্বি ছিড়ে।  
বহু দিন পরে আজ চিন্তা গেল ছুটে,  
হাবুডুবু হবুরাজ্য নড়িচড়ি ওঠে।

ছেলেরা ধরিল খেলা, বৃদ্ধেরা তামুক-  
এক দন্ডে খুলে গেল রমণীর মুখ।  
দেশ-জোড়া মাথা-ধরা ছেড়ে গেল চট,  
সবাই বুঝিয়া গেল-হিং টিং ছট  
স্বপ্নমঙ্গলের কথা অমৃতসমান,  
গৌড়ানন্দ কবি ভনে, শুনে পুণ্যবান।।

যে শুনিলে এই স্বপ্ন মঙ্গলের কথা  
সর্বভ্রম ঘুচে যবে, নহিলে অন্যথা।  
বিশ্বে কভু বিশ্ব ভেবে হবে না ঠকিতে,  
সত্যেরে সে মিথ্যা বলি বুঝিবে চকিতে।  
যা আছে তা নাই আর নাই যাহা আছে,  
এ কথা জাঙ্গল্যমান হবে তার কাছে।  
সবাই সরল ভাবে দেখিবে যা-কিছু  
সে আপন লেজুড় জুড়িবে তার পিছু।  
এসো ভাই, তোল হাই, শুয়ে পড়ো চিত,  
অনিশ্চিত এ সংসারে এ কথা নিশ্চিত—  
জগতে সকলেই মিথ্যা, সব মায়াময়,  
স্বপ্ন শুধু সত্য আর সত্য কিছু নয়।  
স্বপ্ন মঙ্গলের কথা অমৃতসমান,  
গৌড়ানন্দ কবি ভনে, শুনে পুণ্যবান।

শান্তিনিকেতন  
১৮ জ্যৈষ্ঠ ১২৯৯  
সোনার তরী (কাব্যগ্রন্থ)

### ➤ ন্যায়দণ্ড

তোমার ন্যায়ের দণ্ড প্রত্যেকের করে  
অর্পণ করেছ নিজে। প্রত্যেকের 'পরে'  
দিয়েছ শাসনভার হে রাজাধিরাজ।  
সে গুরু সম্মান তব সে দুরূহ কাজ  
নমিয়া তোমারে যেন শিরোধার্য করি  
সবিনয়ে। তব কার্যে যেন নাহি ডরি  
কভু করে।

ক্ষমা যেথা ক্ষীণ দুর্বলতা,  
হে রুদ্র, নিষ্ঠুর যেন হতে পারি তথা  
তোমার আদেশে। যেন রসনায় মম  
সত্যবাক্য ঝলি উঠে খরখড়াসম  
তোমার ইঙ্গিতে। যেন রাখি তব মান  
তোমার বিচারাসনে লয়ে নিজ স্হান।

অন্যায় যে করে আর অন্যায় যে সহে  
তব ঘৃণা যেন তারে ভৃগুসম দহে।

সঞ্চয়িতা (১৪০০ সং.) পৃ. ৪৪১  
নৈবেদ্য গ্রন্থে [রবীন্দ্র রচনাবলী (পশ্চিমবঙ্গ সরকার শতবার্ষিকী সং)  
খণ্ড ২, পৃ ৮৯৩] কবিতার কোনো নাম নেই।



➤ সমালোচক

বাবা নাকি বই লেখে সব নিজে।  
কিছুই বোঝা যায় না লেখেন কী যে!  
সেদিন পড়ে শোনাচ্ছিলেন তোরে,  
বুঝেছিলি? - বল্ মা, সত্যি করে।  
এমন লেখায় তবে  
বল্ দেখি কী হবে।।

তোর মুখে মা, যেমন কথা শুনি  
তেমন কেন লেখেন নাকো উনি।  
ঠাকুরমা কি বাবাকে ককখনো  
রাজার কথা শোনায় নিকো কোনো?  
সে-সব কথাগুলি  
গেছেন বুঝি ভুলি?

স্নান করতে বেলা হল দেখে  
তুমি কেবল যাও, মা, ডেকে ডেকে -  
খাবার নিয়ে তুমি বসেই থাকো,  
সে কথা তাঁর মনেই থাকে নাকো।  
করেন সারা বেলা  
লেখা-লেখা খেলা।।

বাবার ঘরে আমি খেলতে গেলে  
তুমি আমায় বল 'দুট্টু' ছেলে!  
বকো আমায় গোল করলে পরে,  
'দেখছিস নে লিখছে বাবা ঘরে!'  
বল্ তো, সত্যি বল্ ,  
লিখে কী হয় ফল।।

আমি যখন বাবার খাতা টেনে  
লিখি বসে দোয়াত কলম এনে -  
ক থ গ ঘ ঙ হ য ব র,  
আমার বেলা কেন, মা, রাগ কর!  
বাবা যখন লেখে

কথা কও না দেখে।।

বড়ো বড়ো রুল-কাটা কাগোজ  
নষ্ট বাবা করেন না কি রোজ?  
আমি যদি নৌকো করতে চাই  
অম্নি বল 'নষ্ট করতে নাই'।  
সাদা কাগজে কালো  
করলে বুঝি ভালো ?

## ➤ পূজার সাজ

আশ্বিনের মাঝামাঝি উঠিল বাজনা বাজি,  
পূজার সময় এল কাছে ।  
মধু বিধু দুই ভাই ছুটাছুটি করে তাই  
আনন্দে দু হাত তুলি নাচে ।

পিতা বসি ছিল দ্বারে ; দুজনে শুধালো তারে,  
'কী পোশাক আনিয়াছ কিনে ।'  
পিতা কহে, 'আছে আছে তোদের মায়ের কাছে,  
দেখিতে পাইবি ঠিক দিনে ।'

সবুর সহে না আর - জননীরে বার বার  
কহে, 'মা গো, ধরি তোর পায়ে,  
বাবা আমাদের তরে কী কিনে এনেছে ঘরে  
একবার দে-না, মা, দেখায়ে ।'  
ব্যস্ত দেখি হাসিয়া মা দুখানি ছিটের জামা  
দেখাইল করিয়া আদর ।  
মধু কহে, 'আর নেই ?' মা কহিল, 'আছে এই  
একজোড়া ধুতি ও চাদর ।'

রাগিয়া আগুন ছেলে - কাপড় ধুলায় ফেলে  
কাঁদিয়া কহিল, 'চাহি না মা !  
রায়বাবুদের গুপি পেয়েছে জরির টুপি  
ফুলকাটা সাটিনের জামা ।'  
মা কহিল, 'মধু, ছি ছি, কেন কাঁদ মিছামিছি !  
গরিব যে তোমাদের বাপ ।  
এবার হয় নি ধান, কত গেছে লোকসান,  
পেয়েছেন কত দুঃখ তাপ ।  
তবু দেখো বহু ক্লেশে তোমাদের ভালোবেসে  
সাধ্যমত এনেছেন কিনে -  
সে জিনিস অনাদরে ফেলিলি ধূলির 'পরে,  
এই শিক্ষা হল এত দিনে !'

বিধু বলে, 'এ কাপড় পছন্দ হয়েছে মোর,  
এই জামা পরাস আমারে !'

মধু শুনে আরো রেগে ঘর ছেড়ে দ্রুত বেগে  
গেল রায়-বাবুদের দ্বারে ।  
সেথা মেলা লোক জড়ো ; রায়বাবু ব্যস্ত বড়ো,  
দালান সাজাতে গেছে রাত ।  
মধু যবে এক কোণে দাঁড়াইল স্নানমনে  
চোখে তাঁর পড়িল হঠাৎ ।  
কাছে ডাকি স্নেহভরে কহেন করুণ স্বরে  
তারে দুই বাহুতে বাঁধিয়া,  
'কী রে মধু, হয়েছে কী, তোরে যে শুন্যো দেখি !'  
শুনি মধু উঠিল কাঁদিয়া-  
কহিল, 'আমার তরে বাবা আনিয়াছে ঘরে  
শুধু এক ছিটের কাপড় !'  
শুনি রায়-মহাশয় হাসিয়া মধুরে কয়,  
'সেজন্য ভাবনা কিবা তোর !'  
ছেলেবে ডাকিয়া চুপি কহিলেন, 'ওরে গুপি,  
তোর জামা দে তুই মধুকে ।'  
গুপির সে জামা পেয়ে মধু ঘরে যায় ধেয়ে,  
হাসি আর নাহি ধরে মুখে ।

বুক ফুলাইয়া চলে, সবারে ডাকিয়া বলে,  
'দেখো কাকা, দেখো চেয়ে মামা-  
ওই আমাদের বিধু ছিট পরিয়াছে শুধু,  
মোর গায়ে সাটিনের জামা ।'

মা শুনি কহেন আসি লাজে অশ্রুজলে ভাসি  
কপালে করিয়া করাঘাত-  
'হই দুঃখী হই দীন কাহারো রাখি না ঋণ,  
কারো কাছে পাতি নাই হাত ।  
তুমি আমাদেরি ছেলে ভিক্ষা লয়ে অবহেলে  
অহংকার কর ধেয়ে ধেয়ে !  
ছেঁড়া ধুতি আপনার ঢের বেশি দাম তার  
ভিক্ষা-করা সাটিনের চেয়ে ।  
আয় বিধু, আয় বৃকে, চুমো খাই চাঁদমুখে-  
তোর সাজ সব চেয়ে ভালো ।  
দরিদ্র ছেলের দেহে দরিদ্র বাপের স্নেহে  
ছিটের জামাটি করে আলো ।'

➤ কাগজের নৌকা

ছুটি হলে রোজ ভাসাই জলে  
কাগজ-নৌকাখানি।  
লিখে রাখি তাতে আপনার নাম,  
লিখি আমাদের বাড়ি কোন গ্রাম  
বড়ো বড়ো ক'রে মোটা অক্ষরে  
যতনে লাইন টানি।  
যদি সে নৌকা আর-কোনো দেশে  
আর-কারো হাতে পড়ে গিয়ে শেষে  
আমার লিখন পড়িয়া তখন  
বুঝিবে সে অনুমানি  
কার কাছ হতে ভেসে এল স্রোতে  
কাগজ-নৌকাখানি ।।

আমার নৌকা সাজাই যতনে  
শিউলি বকুলে ভরি।  
বাড়ির বাগানে গাছের তলায়  
ছেয়ে থাকে ফুল সকাল বেলায়,  
শিশিরের জল করে ঝলমল  
প্রভাতের আলো পড়ি।  
সেই কুসুমের অতি ছোটো বোঝা  
কোন্ দিক-পানে চলে যায় সোজা,  
বেলাশেষে যদি পার হয়ে নদী  
ঠেকে কোনোখানে যেয়ে -  
প্রভাতের ফুল সাঁঝে পাবে কূল  
কাগজের তরী বেয়ে ।।

আমার নৌকা ভাসাইয়া জলে  
চেয়ে থাকি বসি তীরে।  
ছোটো ছোটো ঢেউ উঠে আর পড়ে,  
রবির কিরণে ঝিকিমিকি করে,  
আকাশেতে পাখি চলে যায় ডাকি,  
বায়ু বহে ধীরে ধীরে ।  
গগনের তলে মেঘ ভাসে কত

আমারি সে ছোটো নৌকার মতো -  
কে ভাসালে তায়, কোথা ভেসে যায়,  
কোন দেশে গিয়ে লাগে।  
ঐ মেঘ আর তরঙ্গী আমার  
কে যাবে কাহার আগে ॥

বেলা হলে শেষে বাড়ি থেকে এসে  
নিয়ে যায় মোরে টানি  
আমি ঘরে ফিরি, থাকি কোনে মিশি,  
যেথা কাটে দিন সেথা কাটে নিশি,  
কোথা কোন্ গাঁয় ভেসে চলে যায়  
আমার নৌকাখানি ।  
কোন্ পথে যাবে কিছু নাই জানা,  
কেহ তারে কভু নাহি করে মানা,  
ধ'রে নাহি রাখে, ফিরে নাহি ডাকে -  
ধায় নব নব দেশে।  
কাগজের তরী, তারি 'পরে চড়ি  
মন যায় ভেসে ভেসে ॥

রাত হয়ে আসে, শুই বিছানায়,  
মুখ ঢাকি দুই হাতে -  
চোখ বুঁজে ভাবি এমন আঁধার,  
কালী দিয়ে ঢালা নদীর দুধার -  
তারি মাঝখানে কোথায় কে জানে  
নৌকা চলেছে রাতে।  
আকাশের তারা মিটি মিটি করে,  
শিয়াল ডাকিছে প্রহরে প্রহরে,  
তরীখানি বুঝি ঘর খুঁজি খুঁজি  
তীরে তীরে ফিরে ভাসি।  
ঘুম লয়ে সাথে চড়েছে তাহাতে  
ঘুম-পাড়ানিয়া মাসি ॥

## ➤ বীরপুরুষ

মনে করো যেন বিদেশ ঘুরে  
মাকে নিয়ে যাচ্ছি অনেক দূরে ।  
তুমি যাচ্ছ পালকিতে মা চড়ে  
দরজা দুটো একটুকু ফাঁক করে,  
আমি যাচ্ছি রাঙা ঘোড়ার 'পরে  
টগবগিয়ে তোমার পাশে পাশে ।  
রাস্তা থেকে ঘোড়ার খুরে খুরে  
রাঙা ধুলোয় মেঘ উড়িয়ে আসে ।

সন্ধে হল, সূর্য নামে পাটে  
এলেম যেন জোড়াদিঘির মাঠে ।  
ধূ ধূ করে যে দিক পানে চাই  
কোনোখানে জনমানব নাই,  
তুমি যেন আপনমনে তাই  
ভয় পেয়েছ; ভাবছ, এলেম কোথা?  
আমি বলছি, 'ভয় পেয়ো না মা গো,  
ঐ দেখা যায় মরা নদীর সোঁতা ।'

চোরকাঁটাতে মাঠ রয়েছে ঢেকে,  
মাঝখানেতে পথ গিয়েছে বেঁকে ।  
গোরু বাছুর নেইকো কোনোখানে,  
সন্ধে হতেই গেছে গাঁয়ের পানে,  
আমরা কোথায় যাচ্ছি কে তা জানে,  
অন্ধকারে দেখা যায় না ভালো ।  
তুমি যেন বললে আমায় ডেকে,  
'দিঘির ধারে ঐ যে কিসের আলো!'

এমন সময় 'হারে রে রে রে'  
ঐ যে কারা আসতেছে ডাক ছেড়ে ।  
তুমি ভয়ে পালকিতে এক কোণে  
ঠাকুর দেবতা স্মরণ করছ মনে,  
বেয়ারাগুলো পাশের কাঁটারে  
পালকি ছেড়ে কাঁপছে থরোথরো।  
আমি যেন তোমায় বলছি ডেকে,

‘আমি আছি, ভয় কেন মা কর।’

হাতে লাঠি, মাথায় ঝাঁকড়া চুল  
কানে তাদের গোঁজা জবার ফুল।  
আমি বলি, ‘দাঁড়া, খবরদার!  
এক পা আগে আসিস যদি আর -  
এই চেয়ে দেখ আমার তলোয়ার,  
টুকরো করে দেব তোদের সেরে।’  
শুনে তারা লক্ষ দিয়ে উঠে  
চঁচিয়ে উঠল, ‘হারে রে রে রে রে।’

তুমি বললে, ‘যাস না খোকা ওরে’  
আমি বলি, ‘দেখো না চুপ করে।’  
ছুটিয়ে ঘোড়া গেলেম তাদের মাঝে,  
ঢাল তলোয়ার ঝন্ঝনিয়া বাজে  
কী ভয়ানক লড়াই হল মা যে,  
শুনে তোমার গায়ে দেবে কাঁটা।  
কত লোক যে পালিয়ে গেল ভয়ে,  
কত লোকের মাথা পড়ল কাটা।

এত লোকের সঙ্গে লড়াই করে  
ভাবছ খোকা গেলই বুঝি মরে।  
আমি তখন রক্ত মেখে ঘেমে  
বলছি এসে, ‘লড়াই গেছে থেমে’,  
তুমি শুনে পালকি থেকে নেমে  
চুমো খেয়ে নিচ্ছ আমায় কোলে -  
বলছ, ‘ভাগ্যে খোকা সঙ্গে ছিল!  
কী দুর্দশাই হত তা না হলে।’

রোজ কত কী ঘটে যাহা তাহা -  
এমন কেন সত্যি হয় না আহা।  
ঠিক যেন এক গল্প হত তবে,  
শুনত যারা অবাক হত সবে,  
দাদা বলত, ‘কেমন করে হবে,  
খোকার গায়ে এত কি জোর আছে।’  
পাড়ার লোকে বলত সবাই শুনে,  
‘ভাগ্যে খোকা ছিল মায়ের কাছে।’



[www.allbdbooks.com](http://www.allbdbooks.com)

[www.allbdbooks.com](http://www.allbdbooks.com)